

Uittreksels uit die Deklarasie van Rustenburg

DIE Rustenburgse Konferensie van Kerke het verlede week na afloop van die byeenkoms, 'n deklarasie van nege bladsye uitgereik. Uittreksels:

● "Ons, 230 verteenwoordigers van 80 kerke en 40 Christelike organisasies wat aan die Nasionale Konferensie van Kerkeleiers in Suid-Afrika deelgeneem het, het op Rustenburg vergader in die geloof dat dit onder die gesag van God se Woord en die leiding van sy Heilige Gees geskied. Ons het opnuut bewus geword van God se genade deur die wyse waarop, ten spyte van ons groot agtergrondverskille, ons mekaar gevind het en tot 'n breë konsensus gekom het deur aanbidding, gebed, konfrontasie, belydenis en vergifnis. Ons was verras om te ontdek dat ons sieninge oor baie sake by mekaar aangesluit het. Sommige van ons stem nie heeltemal saam met alles wat in die konferensie gesê is nie*, maar oor een saak is ons eenstemmig, naamlik die onvoorwaardelike verwerping van apartheid as sonde. . .

● "Terwyl ons in hierdie dokument die aandag vestig op apartheid, erken ons dat daar baie ander sondes in ons samelewing is wat bely moet word.

BELYDENIS

● "As verteenwoordigers van die Christelike kerk in Suid-Afrika, erken ons dat die Suid-Afrikaanse situasie die gevolg is van Westerse kolonialisme. . . en ook dui op die swakheid van die kerk wêreldwyd in sy hantering van sosiale sondes. Hier, egter, bely ons ons eie sonde en erken ons ketterse ("heretical") aandeel in die beleid van apartheid wat tot groot lyding vir so baie mense in ons land aanleiding gegee het. Ons verwerp apartheid in sy bedoeling, sy uitvoering en sy gevolge as 'n sondige beleid. Die toepassing en verdediging van apartheid asof dit Bybels en teologies geregverdig kan word, is 'n daad van ongehoorsaamheid aan God, 'n ontkenning van die evangelie van Jesus Christus, en 'n sonde teen ons eenheid in die Heilige Gees.

● "Ons dink met hartseer aan die slagoffers van apartheid wat gely het en nog altyd ly as gevolg van vernedering, onteiening en dood. Ons eer diegene wat vasberade vir regverdigheid gestaan het en die onderdrukte te hulp gekom het.

● "Ons bely dat ons apartheid op verskillende maniere beoefen, ondersteun en toegelaat het en geweier het om dit teen te staan.

● "Diegene van ons wat apartheid bestendig het en daardeur bevoordeel is, is skuldig aan koloniale arrogansie ten opsigte van die swart kultuur. Ons het die staatsinstellings toegelaat om ons sondes vir ons te doen. . .

● "Diegene van ons wat die slagoffers van apartheid is, erken ons eie aandeel in die mislukking van die kerk. Terwyl kolonialisme en onderdrukking ons selfsprek beskuldig het en die bande van menslikheid wat ons gemeenskappe aanmekaar hou, verswak het, erken ons dat baie van ons met bedeesdheid en vrees gereageer het, en nie ons onderdrukkers uitgedaag het nie. . . Sommige van ons het die gewillige werktuie van die onderdrukkende staatsmasjinerie geword. Ander het op onderdrukking gereageer met die begeerte om wraak te neem. . .

● "Die mans onder ons bely dat ons dikwels die menswaardigheid van vroue geminag het. . .

● "Ons bely dat ons die jongmense gekeer het om volledig deel te neem aan die kerklike lewe. . .

● "Die konferensiegangers erken dat hulle dikwels toegelaat het dat die wêreld eerder as die evangelie hulle optrede stempel en dat hulle hulle selfsugtige eiebelang eerder gedien het as vir Christus. Ons vra die vergifnis van God en ons mede-Suid-Afrikaners.

VERKLARING

● "Die kerk word opgeroep om 'n einde te maak aan rasseongelykheid in die vergoeding van kerklike ampsdraers. . .

● "Die nasie word daarop gewys dat dit absoluut noodsaaklik vir almal is om persoonlike, ekonomiese, sosiale en politieke sondes af te lê, veral die sonde van rassisme in sowel ons gemoed as ons strukture. . .

● "Teenoor die politieke leiers word waardering uitgespreek vir die vordering wat reeds gemaak is, en hulle word dringend versoek om spoedig met onderhandelinge te begin vir 'n nuwe en regverdige bestel vir ons land. Ons doen 'n beroep op die owerheid om as 'n saak van dringendheid alle apartheidswette te herroep. . . Ons doen ook 'n beroep op die owerheid om onvoorwaardelike kwytskelding aan alle politieke uitgewekenes te verleen, alle politieke gevangenes onmiddellik vry te laat, en die gekonfiskeerde eiendom van voorheen verbanne organisasies onmiddellik terug te gee. . .

VERBINTENIS

● "Gehoorzaamheid aan Christus vereis dat ons ons verbind tot die ontwikkeling van 'n ekonomiese stelsel gebaseer op regverdigheid, medelye en medeverantwoordelikheid sodat diegene in nood méér bevoordeel word as hulle wat meer as genoeg besit.

● "Ons verbind ons in die stryd vir 'n regverdige, demokratiese, nie-rassige, nie-seksistiese Suid-Afrika. . .

● "Ons is ons hoogste lojaliteit as Christene altyd aan God verskuldig. . .

● "Ons vra dat die volgende beginsels in 'n nuwe grondwet vir Suid-Afrika eerbiedig word:

- die erkenning van die kosbaarheid van die menslike lewe wat geskape is na die beeld van God

- die aanvaarding van 'n Verklaring van Regte ("Bill of Rights")

- die daarstelling van 'n demokratiese kiesstelsel gebaseer op die beginsel van een man, een stem op 'n gemeenskaplike kieserslys, in 'n veelparty-demokrasie in 'n eenheidstaat.

- die erkenning van die reg van individue of godsdienstige groepe om morele waardes te handhaaf.

● "Ons vra dat die onderhandelinge vir 'n nuwe grondwet gedoen word deur 'n liggaam wat duidelik en ten volle verteenwoordigend is van alle Suid-Afrikaners. Ons vra die Regering om met ander politieke partye te praat oor die daarstelling van 'n vorm van administrasie of regering wat sal verseker dat alle belange van alle Suid-Afrikaners bevredigend verteenwoordig word in die oorgangperiode totdat daar oor 'n nuwe grondwet ooreengekom is.

● "Die aanstigters tot alle vorms van geweld word veroordeel.

● " 'n Vredeskonferensie van alle leiers moet byeengeroep word om 'n einde aan geweld te help maak.

● "Ons neem ons voor om groter erns te maak met die kerk se geestelike lewe, sendingwerk en evangelisasie. . .

RESTITUSIE

● "As eerste stap in die rigting van restituisie (herstel), moet die kerk aandag skenk aan sy grondbesit en die teruggee van alle grond wat van hervestigde gemeenskappe geneem is. . . "Wit" skole moet vir mense van alle rasse oopgestel word.

● "Ons vra dat 'n Nasionale Dag van Gebed gehou word."

* Volgens 'n verduideliking by die konferensie, sluit dit die deklarasie in.